

雷波廳志卷之七

城池志

戎馬近郊倏去倏來城小而陋乃禍之胎彼縱弗攻我貴能守鑿之宜深築之宜厚仰維賢吏創始經營受降而後並建三城黃螂東啓三稜北築鞏固千年賴茲鼎足志城池第七

雷波廳舊城雍正八年衛守備胡漪請款建修以資捍衛奉文動支鹽茶耗羨委潼川知州徐遵義總理順慶府同知管臚傳宜賓縣知縣許王謨監築修造

雷波廳志

卷之七

城池

一

土城五百九十四丈城樓四座高一丈二尺周圍三里三分門四東迎恩南宣化西永安北拱辰城內哨樓八座水洞三道外西甯土堡一座

按西甯在雷波東一百四十里


舊設汛防歸馬邊管轄今改隸屏山縣土堡漸廢

乾隆九年西城坍塌數十丈衛守備郭佩補修六十年通判富森保復補築

嘉慶六年通判方懷萱見風雨飄淋土垣頽塌行人跬步可踰乃捐廉集資四面修補為文以記

通判方懷萱記

雷波界連滇省地接凉山自我



朝開疆設衛以來迄今七十餘年煙戶漸多商賈日盛雖處崇山峻嶺之間亦川南一重地也粵稽雍正八年土酋內附之時各座共長四里有餘所資捍衛者至周且備惟是歲月既深風雨頽塌行人跬步可踰者將數十處余於嘉慶五年四月間署理俸篆詢之鄉耆據云各年修補城垣俱係各糧戶按糧攤派乃去歲秋收歉薄民力拮据不忍以此重累閭閻爰勸城內諸紳士舖戶鄉保總役等量力修補余亦捐俸以成其事於嘉慶五年八月經始六年二月工竣共修城垣一百三十五丈雖未比金湯之固亦可期磐石之安惟彌縫補葺已無愧乎始基而繼長增高更有望於後任也

嘉慶二十年復坍二十餘丈通判尙志政補修

道光十八年通判劉耀庚以邊疆要地捍衛是資前築土城不足以固邊隅而禦外侮因請款改建石城

雷波廳志 卷之七 城池 二

估計報銀一萬六千兩奉准由布政使蘇廷玉委縣丞張勤府經歷吳培先後解銀一萬五千兩交廳支發並委從九傅振宗廳屬照磨郭景夔監工修築城周六百五十三丈高一丈五尺六寸足寬一丈九尺女牆面寬五尺城樓四座各高一丈八尺門四東觀光南金帶西福喜北錦屏礮臺六座各四方一丈二尺

通判劉耀庚記

雷波古荒服也僻在蜀之西南隅自雍正七年黃太保戡定後始設流官建城郭而土垣高不及尋亦無雉堞歲久傾圯殆盡民貧地瘠雖欲議修而未能

也道光丁酉秋涼山生番出擾余以慶符合從軍卽  
攝通判事因念雷波爲馬屏門戶滇蜀藩籬且與猺  
夷共域而居苟捍衛無資將何以嚴管鑰而謹斥堠  
乎爰捐俸補葺爾時遂有改築之願戊戌春夷匪平  
以報銷事晉省得力陳於前制府八閩蘇公特發  
帑金命建石城旋雷之日適生夷又復潛來距廳城  
祇數里居民恐甚余亟會營僚定戰守計顧斗大頽  
垣登陴無容足處不得已於城北後山高塹督弁兵  
募丁壯列陣以待賊見我軍屹如山立乃不敢踰溝  
翼日始退去而築城愈不可緩矣卽日經營相度鳩  
匠鑿石卜吉興工九閱月而告成計垣高一丈五尺  
餘徑圍六百餘丈譙樓四燮臺六水洞五城濠廣狹  
有差邊隅重地儼然一雄關矣是役也余固首創其  
議然非蘇公毅然籌發大帑此舉斷不就則雷民  
之仰戴我蘇公爲何如哉茲者崇墉鞏固吾民皆  
安枕無驚其蠢虜之跳梁不法者迭經捕獲咸伏  
天誅而良者自當懷德畏威永奉我  
國家道一風同之治夫固日引月長有備無患也雖然

雷波廳志

卷之七

城池

三

一勞永逸者有司所以盡守土之責居安思危者邊  
氓所以爲禦侮之謀從來地利不如人和苟眾志成  
城守望相助則萬年樂利永靖烽煙將尤勝於百堵  
之興聊固吾圉已也爰書顛末勒諸貞珉云

光緒八年松潘鎮總兵李培榮統兵來雷辦理夷務  
事平後捐銀一千兩命廳紳楊寶林李景江羅廷柱  
薛光祐修築東南兩門耳城以資保衛

黃螂舊城明萬曆十七年設巡檢時所築歲久傾圮  
國朝雍正八年設防禦所無城可守雷波衛守備胡漪

乃請款建修奉文動支鹽茶耗羨與雷波衛城垣一  
同修築仍委潼川州知州徐遵義總理敘州府通判

瞿燕詒屏山縣知縣馮又興監築土城四百八十六丈周二里七分門四無樓城之西北憑山扼險高立崇墉東南則有小湖環繞之以水爲固

乾隆三十一年城圯數處通判曹芝田捐廉檄飭巡檢梁堯佐補修並建蜈蚣架六十年通判富森保復行補築

同治中巡檢沈彬紳士徐星漢稟明 上憲就地抽取鴉片煙釐金改建石城累年修築尙未完工至光緒八年松潘鎮總兵李培榮來雷勦辦夷務捐銀一

雷波廳志

卷之七

城池

四

千兩補修完竣

普安右營石城道光十八年通判劉耀庚請款建修川督寶興於奏定邊防長策案內據情入告奉

上諭寶興查勘四川各廳州縣城垣隄堡各要工宜及時興

修欽此因檄飭通判劉耀庚會同普安營參將盛世祥勘報應修三稜岡石城一座守備千總把總外委署各一所兵房六百間黑角土城一座千總外委署各一所兵房三百七十五間五寶山土堡一座兵房七十五間偏崖汛土堡一座兵房八連馬頸子汛土

堡一座樓門三座周二百五十丈兵房七十六連是  
年八月布政使蘇廷玉親臨覆勘旋省卽由司庫發  
銀委州判周岐源府經歷吳埴解運至雷並委雷波  
訓導張學古照磨滕國倫監築至二十二年各工一  
律告竣三稜岡石城周圍四百二十丈礮臺兩座開  
東西北三門南方峭壁懸崖道路不通唯修礮臺爲  
守禦同時築馬頸子土堡一座周圍三百八十丈黑  
角汛土堡一座周圍二百四十丈五寶山土堡一座  
西蘇角石牆一道星羅棋布邊備井然利賴至今日

雷波廳志

卷之七

城池

五

焉